

INFORME SECTORIAL DE AUGAS DE GALICIA

ASUNTO: SOLICITUDE DE INFORME DO ESTUDO DE IMPACTO AMBIENTAL PARQUE EÓLICO MARCOFÁN (IN408A 2017)

UBICACIÓN: CONCELLOS DE BEARIZ, BOBORÁS E O IRIXO (OURENSE)

SOLICITANTE: SERVIZO DE ENERXÍA E MINAS DA XEFATURA TERRITORIAL DE OURENSE DA VICEPRESIDENCIA SEGUNDA E CONSELLERÍA DE ECONOMÍA, EMPRESA E INNOVACIÓN

PROMOTOR: MARCOFÁN EÓLICA, S.L.

Obxecto

O obxecto deste informe é responder á solicitude do 2 de maio do 2022, do Servizo de Enerxía e Minas da Xefatura Territorial de Ourense da Vicepresidencia Segunda e Consellería de Economía, Empresa e Innovación, referente á obtención de informe, dentro das competencias de Augas de Galicia, sobre o documento do Estudo de Impacto Ambiental do Parque Eólico Marcofán de xullo de 2021, en cumprimento do establecido no artigo 37 da Lei 21/2013, do 9 de decembro de Avaliación Ambiental e demais normas vixentes que sexan de aplicación.

Segundo se indica na documentación aportada, o obxecto do Estudo de Impacto Ambiental é cumprimentar os requirimentos que establece a Lei 21/2013 de avaliación ambiental.

Antecedentes

O 27 de xaneiro de 2022, a Vicepresidencia Segunda e Consellería de Economía, Empresa e Innovación publicou no DOG Nº 18 o Acordo do 20 de xaneiro de 2022, da Xefatura Territorial de Ourense, polo que se someten a información pública as solicitudes de autorización administrativa previa e de construción, o proxecto de interese económico e o estudo de impacto ambiental do proxecto do parque eólico Marcofán, nos concellos do Irixo, Boborás e Beariz, provincia de Ourense (expediente IN408A 2017/28).

Lexislación aplicable

- Real Decreto Lexislativo 1/2001, do 20 de xullo, polo que se aproba o Texto Refundido da Lei de Augas (en diante TRLA).
- Regulamento do Dominio Público Hidráulico, aprobado por Real decreto 849/1986, do 11 de abril (en diante RDPH).
- Lei 9/2010, do 4 de novembro, de Augas de Galicia.
- Decreto 1/2015, do 15 de xaneiro, polo que se aproba o Regulamento da planificación en materia de augas de Galicia e regúlanse determinadas cuestións no desenvolvemento da Lei 9/2010, do 4 de novembro, de augas de Galicia
- Real decreto 11/2016, do 08 de xaneiro, polo que se aproba o Plan Hidrolóxico da Demarcación Hidrográfica de Galicia Costa.
- Directiva 2007/60/CE do Parlamento Europeo e do Consello, do 23 de outubro de 2007, relativa á avaliación e xestión dos riscos de inundación.
- Real Decreto 903/2010, do 9 de xullo, de avaliación e xestión de riscos de inundación.
- Real Decreto 19/2016, do 15 de xaneiro, polo que se aproba o Plan de Xestión do Risco da Inundación da Demarcación Hidrográfica de Galicia – Costa.



- Directiva 2000/60/CE do Parlamento Europeo e do Consello, do 23 de outubro de 2000, pola que se establece un marco comunitario de actuación no ámbito da política de augas.

Análise da documentación

A documentación aportada para o presente informe é o **"Estudio de Impacto Ambiental. Parque eólico Marcofán"** de xullo de 2021, redactado por un equipo multidisciplinar da empresa Adantaia S.L, formado por Jordi Solans Oste, director técnico e licenciado en Bioloxía; Victoriano de la Torre Canelo, coordinador e licenciado en Ciencias Biolóxicas; Carolina Bernal Juy, técnica e licenciada en Ciencias Ambientais, Miguel Álvarez Alonso, técnico e licenciado en Ciencias Ambientais; Miguel Álvarez Lorenzo, técnico e licenciado en Bioloxía e coa colaboración dos técnicos licenciados en Bioloxía César Arquero Lorenzo e Belén Piña Cabral. O dito estudio de impacto ambiental consta dunha memoria, planos e 12 anexos. Todos os documentos están en formato dixital (pdf).

A continuación describíense brevemente as obras do parque eólico segundo a documentación aportada.

O parque eólico Marcofán sitúase nos concellos de Beariz, Boborás e O Irixo (Ourense) dentro da Área de Desenvolvemento Eólico "O Paraño", do Plan Sectorial Eólico de Galicia.

O parque eólico constará de 7 aeroxeradores tipo Vestas V162, de paso variable e potencia unitaria 5,6 MW, diámetro do rotor 162 m. e altura de buxa 119 m. Sendo a potencia total prevista no parque de 39.2 MW.

As coordenadas UTM dos aeroxeradores son as seguintes:

Nome	X UTM (H29 ETRS89)	y UTM (H29 ETRS89)	Concello
1	562.869	4.706.578	Boborás
2	563.025	4.706.253	Boborás
3	561.333	4.703.651	Beariz
4	561.402	4.703.298	Beariz
5	561.466	4.702.943	Beariz
6	561.481	4.702.584	Beariz
7	561.564	4.702.233	Beariz

A obra civil proxectase co criterio de minimizar, na medida do posible, a alteración do medio natural e comprende as seguintes actuacións:

- Plataformas de montaxe ou zonas de manobra

Co obxecto de asegurar a estabilidade dos guindastres empregados durante a montaxe das torres e os aeroxeradores proxéctase construír preto de cada torre unha plataforma horizontal de dimensións xenéricas 1.830 m².

- Cimentación de aeroxeradores

O pedestal fórmase co anel de aceiro de ancoraxe que queda embebido na zapata e énchese parcialmente de formigón, dimensionadas para resistir os esforzos de volta e deslizamento que producen as forzas actuantes sobre as torres.

- Accesos e vías interiores

Trátase de minimizar o número de camiños de nova creación aproveitando os existentes.

Os accesos ao parque proxéctanse dende a estrada N541. Proxéctase un ancho mínimo de 6 metros necesario para o paso dos transportes. Aproveitarase no seu caso a plataforma dos camiños existentes, e nivelaranse en ensancharanse cando sexa preciso para permitir o paso dos equipos.

- Gabias para cableado

Realízanse as gabias necesarias para a canalización dos cables de evacuación de enerxía producida ata a subestación, así como para o tendido da rede de terras, estas serán de variable e de profundidade 1 ou 1,20 m.

- Centro de seccionamento

Centro de seccionamento e medida do parque eólico ten funcións de seccionamento e protección dos diferentes circuitos do parque en tensión de 30 kV. Actúa ademais como centro de medida da enerxía eléctrica xerada no parque eólico, estando dotado dun armario de medida cos respectivos contadores.

A súa localización no parque é tal que permite integrar os diferentes circuitos de tensión 30 kV procedentes das distintas agrupacións de aeroxeradores.

O edificio do centro de seccionamento consistirá nun módulo prefabricado normalizado que non require obra civil "*in situ*", salvo a nivelación do terreo. A súa planta é de tipo rectangular e as dimensións exteriores serán de 8,08 x 2,38 m. Adicionalmente, inclúese unha beirarrúa perimetral de 0,8 m de ancho.

As coordenadas da envolvente do centro de seccionamento e medida son as seguintes:

Nº de vértice envolvente	X UTM (H29 ETRS89)	Y UTM (H29 ETRS89)
A	561.852	4.704.282
B	561.860	4.704.288
C	561.862	4.704.285
D	561.854	4.704.279

- Subestación

O Parque Eólico Marcofán compartirá unha mesma subestación colectora cos outros parques da contorna, denominada Subestación colectora Paraño 400/132/30 kV, que non forma parte do presente proxecto. Si forma parte a conexión do parque con esta subestación, que se materializa mediante tres circuitos eléctricos subterráneos executados en gabia única e condutores RHZ1 18/30 RHZ1 18/30

3x(1x240/400/630) AL. A arqueta receptora dos diferentes circuítos pertencente á subestación colectora localízase nas seguintes coordenadas:

	X UTM (H29 ETRS89)	Y UTM (H29 ETRS89)
Centro	561.855	4.704.276

O Estudo de Impacto Ambiental (EIA) describe tanto a situación do medio abiótico como biótico, previa a construción do parque, deste xeito, poder determinar posteriormente as posibles afeccións.

Inclúese, entre outros, un apartado de descrición xeral do proxecto, análise de alternativas, inventario ambiental, identificación, cuantificación e valoración de impactos, onde se analizan os principais impactos que se poderán producir durante as distintas fases do proxecto e as medidas preventivas, correctoras e compensatorias previstas, para evitar ou reducir os efectos negativos que a actividade proxectada introduce sobre a rede fluvial. Tamén inclúe un programa de vixilancia ambiental para garantir o cumprimento das medidas protectoras e correctoras.

En canto a rede hidrolóxica superficial no documento obxecto de estudo indícase que a practica totalidade do territorio afectado polo proxecto pertence ao ámbito competencial da Confederación Hidrográfica Miño-Sil salvo o emprazamento do aeroxerador núm. 1 que estaría no ámbito competencial da Demarcación Hidrográfica de Galicia –Costa.

No apartado 7.1.4 Hidroloxía da memoria relaciónanse os diferentes cruzamentos dos elementos do parque con DPH, non estando ningún deles dentro do ámbito de competencia da Demarcación Hidrográfica de Galicia –Costa.

INFORME:

Polo tanto, á vista da documentación aportada, procédese a informar os seguintes aspectos que se detallan a continuación, sen prexuízo das demais competencias que ten atribuídas este organismo de bacía e sen entrar a valorar outras consideracións técnicas, urbanísticas ou ambientais que non son obxecto deste informe.

Rede fluvial

O parque eólico Marcofán atópase nos concellos de Beariz, Boborás e O Irixo (Ourense) dentro dos ámbitos de actuación da Confederación Hidrográfica do Miño-Sil (parte do aeroxerador 1 e os aeroxeradores núm. 2, 3, 4, 5, 6 e 7 así como as súas infraestruturas asociadas) e da Demarcación Hidrográfica Galicia Costa (parte do aeroxerador núm. 1). Os sistema de explotación (SE) nos que se localizan as infraestruturas son o número 05 "Río Ulla e ría de Arousa (marxe dereita)", dentro do ámbito de actuación da Demarcación Hidrográfica Galicia Costa, e o sistema de explotación "Miño baixo ", dentro do ámbito de actuación da Confederación Hidrográfica do Miño-Sil.

Discorren próximos ás actuacións definidas na documentación de referencia, dentro da Demarcación Hidrográfica Galicia-Costa, os seguintes cursos fluviais codificados por Augas de Galicia: río Deza (2440591702) e os seus afluentes o río da Chouriza (24405917022) e oreiro da Besada sen codificar. Dentro da Confederación Hidrográfica Miño-Sil, discorre próximo ás actuacións o rego Cardelle I



(ES475MAR001880). Non hai encoros próximos á zona de implantación do parque no ámbito territorial da Demarcación Hidrográfica Galicia-Costa.

Pódese consultar e contrastar todos os datos expostos neste apartado na web de Augas de Galicia <http://mapas.xunta.gal/visores/dhgc/>.

Vista a documentación presentada, e segundo o visor de Augas de Galicia, consultada a rede fluvial de detalle actualizada 2021 da Demarcación Hidrográfica Galicia-Costa, as instalacións do parque eólico non presentan afeccións ao Dominio Público Hidráulico, no ámbito territorial da Demarcación Hidrográfica de Galicia Costa.

Cómpre sinalar que no caso de que existan cursos fluviais, cunha bacía de aportación inferior a 1 km², ou calquera elemento susceptible de consideración como dominio público hidráulico, seranlles de aplicación a normativa e lexislación de augas, tendo plena vixencia as prescricións establecidas para o dominio público hidráulico.

Para a execución de novos camiños de acceso, modificacións dos existentes ou construción de gabias que requiran actuacións localizadas en zona de Dominio Público Hidráulico ou en zona de policía deberase solicitar autorización administrativa de Augas de Galicia.

Deberase cumprir o establecido no artigo 36 da Normativa do PHGC, e segundo o establecido no artigo 9.4 e 78 do RDPH solicitar autorización administrativa de Augas de Galicia. Á solicitude de autorización deberán unirse, ademais unha memoria na que se describan técnica e construtivamente as obras, planos de planta, seccións tipo, e perfís transversais, onde se reflictan as actuacións a realizar e as marxes dos leitos así como a zona de servidume e policía. Deberán igualmente definirse construtivamente os cruces dos leitos no caso de que se modifiquen os existentes, ou se realicen novos cruces. Nese momento procedementa poderase solicitar por parte de Augas de Galicia tanta documentación se considere necesaria.

Do mesmo xeito, indicar que no caso de que a superficie destinada a aloxar o campamento de obra e o punto limpo se sitúe en zona de policía, deberase solicitar autorización administrativa de Augas de Galicia.

Igualmente, no caso de que se realicen talas de árbores en zona de servidume, segundo o establecido no artigo 7 do RDPH se deberá solicitar autorización administrativa a Augas de Galicia.

Destacar en todo caso, que a lexislación sectorial de augas establece unha zona de servidume e policía en tódolos leitos públicos e en toda a súa lonxitude, con independencia da clasificación do solo e con independencia de que estean ou non grafados nos planos de ordenación. Segundo o establecido no artigo 9.4 e 78 do RDPH calquera actuación precisará autorización administrativa do Organismo de Bacía independente doutra que teña que ser outorgada por outro Organismo da Administración.

Zonas protexidas

Analizada a documentación aportada, as actuacións propostas non afectan a ningunha das zonas protexidas recollidas no Catálogo de zonas protexidas do PHGC aprobado por R.D. 11/2016 de 8 de Xaneiro.

A información relativa ás zonas protexidas pódese consultar na páxina web de Augas de Galicia, <http://mapas.xunta.gal/visores/dhgc/>.



No tocante ás Zonas de Captación para Abastecemento Humano recollidas no PHGC, as actuacións propostas non afectan a ningunha (considerando unha distancia de 500 m ao redor das obras).

Detállanse a continuación as zonas protexidas e a súa categoría identificadas na contorna da infraestrutura proxectada:

ZONAS PROTEXIDAS PHGC	NOME	CODIFICACIÓN	OBSERVACIÓNS
Tramo de Interese de Especies Ameazadas	Asneiro	ES014TIE000000019	A 1 km do aeroxerador núm. 1
Reserva Natural Fluvial	Ulla Deza	ES014RNFL000000005	A 1 km do aeroxerador núm.1
ZONAS PROTEXIDAS NIVEL EUROPEO	NOME	CODIFICACIÓN	OBSERVACIÓNS
ZEC	Serra do Candón	ES014ZECE51140013	A 321 m do aeroxerador núm. 1.
Zona captación de zona sensible		ESCM626	A 3,4 km do centro de seccionamento

Non se detectaron zonas protexidas a nivel internacional, estatal ou autonómico, próximas ás actuacións previstas.

Deberase atender as prescricións feitas na planificación hidrolóxica sobre estas zonas, así como os condicionantes establecidos polos organismos competentes.

Zonas inundables

Son zonas inundables, segundo o artigo 26 do PHGC, as delimitadas polos niveis teóricos que acadarían as augas nas enchentes de período estatístico de retorno de cincocentos anos, atendendo a estudos xeomorfolóxicos, hidrolóxicos e hidráulicos, así como de series de enchentes históricas e documentos ou evidencias históricas destas. Segundo o artigo 14 do RDPH, -tendo en conta a súa modificación operada polo Real Decreto 638/2016 (Boletín Oficial do estado do 29 de decembro)-, estes terreos compren labores de retención ou alivio dos fluxos de auga e carga sólida transportada durante as ditas enchentes ou de resguardo contra a erosión. Estas zonas declararanse nos lagos, lagoas, embalses, ríos ou regos.

Ademais, cómpre ter en conta que a cualificación como zonas inundables non alterará a cualificación xurídica e a titularidade demanial dos terreos.

A zona de fluxo preferente, segundo o definido no artigo 27 do PHGC e no 9 do RDPH, é aquela zona constituída pola unión da zona ou zonas onde se concentra preferentemente o fluxo durante as enchentes, ou vía de intenso desaugamento, e da zona onde, para a avenida de 100 anos de período de retorno, se poidan producir graves danos sobre as persoas e os bens, quedando delimitado o seu límite exterior mediante a envolvente de ambas as dúas zonas.

As inundacións producidas polas crecidas non ordinarias considéranse un fenómeno natural aleatorio de ocorrencia periódica, de intensidade e magnitude non previsible polo que teñen a consideración, no caso de producirse, de forza maior (Artigo 41 PHGC).

Para as zonas de fluxo preferente e as zonas inundables deberanse de respectar e recoller expresamente as prescricións recollidas do capítulo VII da Normativa do Plan Hidrolóxico Galicia – Costa (Art. 26 – 41) Protección contra as inundacións. Deste xeito, segundo o artigo 30 “Contido dos instrumentos de planificación de carácter territorial ou urbanístico” deberanse incorporar á documentación do

instrumento de planificación de carácter territorial ou urbanístico, naquelas zonas afectadas por Áreas de Risco Potencial Significativo de Inundación (ARPSIs), a seguinte documentación:

- Planos onde se reflecta, sobre a ordenación proposta, o dominio público hidráulico e as súas zonas de servidume e policía.
- Planos onde se reflecta, sobre a ordenación proposta, as zonas inundables.
- Planos onde se reflecta, sobre a ordenación proposta, as zonas de fluxo preferente.

Cabe destacar o seguinte:

No artigo 33 do PHGC recóllense as condicións nas que a Administración Hidráulica de Galicia poderá outorgar as autorizacións nas zonas inundables dentro da zona de policía.

No artigo 34 do PHGC indícanse unha serie de limitacións de usos para a zona de fluxo preferente. Deste xeito, segundo ese artigo, con carácter xeral non se autorizarán nesta zona unha serie de actividades (acampadas ou instalacións destinadas a este fin; a realización de construcións destinadas a vivendas; a execución de instalacións industriais ou edificacións nas que habitualmente haxa presenza de persoas; a construción de cerramentos e valados que non sexan permeables; a realización de recheos ou amoreamentos de materiais de calquera tipo que provoquen unha redución significativa da vía de intenso desaugamento; execución de infraestruturas lineais deseñadas de modo tendente ao paralelismo coa canle, coa excepción das de saneamento, abastecemento e outras canalizacións subterráneas que en todo caso, salvo en zonas puntuais en que non exista solución viable, deberán situarse fóra da zona de servidume).

Do mesmo xeito cabe destacar que para obter a autorización de realización de calquera actividade na zona de fluxo preferente deberase achegar o seguinte: xustificación de que non se modifica de xeito significativo a zona de fluxo preferente, a zona inundable ou o réxime das correntes; xustificación da compatibilidade cos criterios e medidas preventivas que se establezan, se é o caso, no Plan de Xestión do Risco de Inundación e declaración xurada do solicitante no que exprese que coñece e asume o risco asociado ao desenvolvemento da actividade na zona de fluxo preferente e as medidas de protección civil aplicables.

Asemade, deberanse ter en conta as prescricións recollidas nos artigos 9 e 14 do RDPH, coas súas modificacións introducidas polo RD 638/2016. Tamén, -tendo en conta a modificación operada polo dito Real Decreto 638/2016-, deberase atender ao establecido nos novos artigos que se incorporan ao RDPH: 9bis, relativo ás Limitacións de usos na zona de fluxo preferente no solo rural; 9ter, que regula as condicións nas que se poden autorizar as Obras e construcións na zona de fluxo preferente en solos en situación básica de solo urbanizado; 9quater, que establece un Réxime especial en municipios con máis de 1/3 da súa superficie incluída na zona de fluxo preferente; 14bis, no que se establecen as Limitacións de usos do solo na zona inundable.

No artigo 9bis.3 recóllese expresamente que toda actuación na zona de fluxo preferente deberá contar cunha declaración responsable, presentada ante a Administración Hidráulica competente e integrada, no seu caso, na documentación do expediente de autorización, na que o promotor exprese claramente que coñece e asume o risco existente e as medidas de protección civil aplicables ao caso, comprometéndose a trasladar esa información aos posibles afectados, con independencia das medidas complementarias que estime oportuno aplicar para a súa protección. A dita declaración será independente de calquera autorización ou acto de intervención administrativa que teña que ser outorgada polos distintos órganos das Administracións públicas, con sometemento, ao menos, ás limitacións de usos que se establecen no artigo 9bis. En particular, estas actuacións deberán contar con carácter previo a súa realización, segundo



proceda, coa autorización na zona de policía ou co informe da Administración Hidráulica. A declaración responsable deberá presentarse ante a Administración Hidráulica cunha antelación mínima dun mes antes do inicio da actividade nos casos nos que non fose incluída nun expediente de autorización.

Nos artigos 9ter e 9quater, engádese que, ademais do esixido no artigo 9bis.3, con carácter previo ao inicio das obras, o promotor deberá dispoñer do certificado do Rexistro da Propiedade no que se acredite que existe anotación rexistral indicando que a construción se atopa en zona de fluxo preferente.

No artigo 14bis.3, establécese que, nas zonas inundables, as administracións competentes fomentarán a adopción de medidas de diminución da vulnerabilidade e autoprotección. Ademais, o promotor deberá subscribir unha declaración responsable na que exprese claramente que coñece e asume o risco existente e as medidas de autoprotección aplicables ao caso, comprometéndose a trasladar esta información aos posibles afectados, con independencia das medidas complementarias que estime oportuno adoitar para a súa protección. No artigo 14bis. 4, engádese que, con carácter previo ao inicio das obras, o promotor deberá dispoñer do certificado do Rexistro da Propiedade no que se acredite que existe anotación rexistral indicando que a construción se atopa en zona inundable.

O artigo 11 do Real decreto Lexislativo 1/2001, establece que os organismos de bacía darán traslado ás Administracións competentes en materia de ordenación do territorio e urbanismo dos datos e estudos dispoñibles sobre enchentes, co obxecto de que se teñan en conta na planificación do solo, e en particular, nas autorizacións de usos que se acorden en zonas inundables.

Na páxina web de Augas de Galicia <http://mapas.xunta.gal/visores/dhgc/>, pódense consultar e descargar as ARPSIs (Áreas de Risco Potencial Significativo de Inundación), as manchas de inundación asociadas a distintos períodos de retorno e as zonas de fluxo preferente.

Segundo este visor, o ámbito de actuación non está afectado por ningunha ARPSI fluvial da Demarcación Hidrográfica Galicia-Costa.

Aproveitamentos hídricos

Na documentación aportada non se fai referencia a captacións de auga. Consultado o Libro de Rexistro de Augas de Galicia, e **salvo erro ou omisión**, non constan as captacións inscritas na contorna do ámbito da actuación (considerando unha distancia de 500 metros ao redor das obras):

Destacar que, no caso de afectar a algunha captación de augas inscrita, como consecuencia das actuacións propostas no proxecto obxecto de estudo, deberase contemplar a súa reposición.

O artigo 143 do Regulamento do dominio público hidráulico establece que toda modificación das características dunha concesión requirirá autorización administrativa previa do mesmo órgano outorgante e nos seguintes artigos detállase a tramitación das variacións de características consideradas como esenciais, como pode ser o cambio de punto de captación.

Consecuentemente co indicado no parágrafo anterior, o titular dos traballos deberá elaborar e facilitar aos afectados por esas reposicións toda a documentación necesaria para a tramitación da modificación da correspondente concesión.

Actuacións susceptibles de causar afeccións ao medio hídrico

No caso dos camiños, a drenaxe lonxitudinal e transversal debe cumprir o establecido no artigo 36 da Normativa do Plan Hidrolóxico Galicia Costa:



"Art.36: Obras de paso de infraestruturas de transporte"

1. As pontes ou obras de drenaxe transversal dimensionaranse con carácter xeral para o período de retorno de 500 anos, salvo que a Administración hidráulica de Galicia admita outro período de retorno debidamente xustificado no proxecto da nova infraestrutura, atendendo ás peculiaridades da zona, a entidade do leito e das características da propia infraestrutura: tránsito, importancia...

2. As obras de drenaxe dimensionaranse de modo que non se produza acumulación dos escorregamentos nunha determinada zona ou que non se engadan a unha valgada áreas vertentes superiores en máis dun 10 % á superficie da bacía propia. En todo caso, as obras de drenaxe transversal dimensionaranse para a enchente de T=500 anos, e debe xustificarse debidamente ante a Administración hidráulica de Galicia o uso dun período de retorno menor ou, no caso da drenaxe lonxitudinal, xustificando o período de retorno utilizado, atendendo ás peculiaridades da zona e ás características das infraestruturas (tránsito, importancia...), así como a súa afección ao dominio público hidráulico".

Deberase solicitar a correspondente autorización de obras segundo o establecido nos artigos 9.4, 78 e 126 do RDPH onde se estableceran tódalas condicións específicas que procedan no exercicio das funcións de tutela que corresponden a Augas de Galicia, así como as modificacións ou prescricións a ter en conta para que o proxecto sexa compatible coa preservación do medio hídrico.

No caso no que novos camiños de acceso ou as modificacións dos existentes se localicen en zona de policía deberase segundo o establecido no artigo 9.4 e 78 do RDPH solicitar autorización administrativa de Augas de Galicia.

Na documentación presentada indícase que dentro dos límites da subestación se construíra un edificio e un almacén de residuos que se completará con instalacións auxiliares (depósito de auga, fosa séptica, etc.) no interior da propia subestación.

Por esta Entidade, cómpre lembrar que se se pretende realizar un aproveitamento de augas, deberase solicitar ante este Organismo de Bacía, o uso privativo por disposición legal ou concesión administrativa, tal e como se sinala nos artigos 54 e 59 do TRLA. Asemade, cómpre lembrar que haberá de solicitarse a correspondente autorización de vertido ante este Organismo de Bacía, de acordo co establecido no artigo 245 do Regulamento do Dominio Público Hidráulico, se se vai empregar para as augas residuais unha depuradora ou unha fosa non estanca, así como localizar axeitadamente na documentación gráfica o punto de vertido e/ou fosa séptica.

Así mesmo, aínda que non se sinala nada ao respecto na documentación examinada, se houberse algún vertido haberá de solicitarse a correspondente autorización de vertido ante esta Entidade, de acordo co establecido no artigo 245 do RDPH.

Convén engadir que as obras que no seu día se desenvolvan, haberán de cumprir as Condicións particulares deste informe.

Condicións particulares

Para os traballos a realizar, indicados no documento obxecto de informe, que se desenvolvan dentro do territorio Galicia Costa, en zona de servidume, así como os movementos de terras previstos, disporase de barreiras de retención de sedimentos e entre estas e os leitos disporase un pano de xeotextil chantado ao terreo. Revisaranse periodicamente para repoñelas no caso de deterioro.



Prohíbese acumular sustancias, calquera que sexa a súa natureza e lugar en que se depositen, que constitúan ou poidan constituír un perigo de contaminación das augas (superficiais ou subterráneas) do Dominio Público Hidráulico e/ou de degradación do seu entorno.

Prohíbese o vertido directo ou indirecto de augas ou produtos residuais susceptibles de contaminar as augas continentais ou calquera outro elemento do Dominio Público Hidráulico sen a correspondente autorización de vertido. Deberase obter a preceptiva autorización para calquera novo punto de vertido á canle que puidera producir contaminación do dominio público hidráulico segundo o art. 245 do RDPH, relativo ás autorizacións de vertidos directos e indirectos.

Débense adoptar as medidas que garantan a estabilización de forma adecuada dos solos alterados polo tránsito de maquinaria evitando a erosión e posible arrastre de materiais ata os leitos.

Durante a execución dos traballos non se poderán utilizar as marxes dos ríos e ribeiras como lugares para o depósito de materiais, parque de maquinaria, lavados e, en xeral, todas aquelas actividades que supoñan un risco de contaminación das augas ou alteracións do ecosistema asociado.

Para o caso de execución dos alicerces e das gabias haberase de considerar non afectar á modificación dos niveles freáticos que puideran alterar captacións existentes aínda que estas non presentaran aparencia de afectación.

No caso da execución dos camiños de servizo, explanación de vellos camiños ou calquera obra de movemento de terras, en zona de policía, a empresa adxudicataria das obras deberá solicitar a correspondente autorización de obras.

Rematadas as obras, en tódalas aquelas zonas que dalgún xeito sufrisen unha degradación (tránsito de maquinaria en zona de policía) procederase á súa rehabilitación ata conseguir a reposición dos terreos ao estado primitivo.

Os residuos xerados durante a construción terán que ser trasladados a vertedoiro de residuos de construción autorizado e presentarse certificado deste traslado ao remate das obras.

Do mesmo xeito haberase de solicitar autorización para a extracción de préstamos en zona de policía de leitos.

Conclusión

Vista a documentación aportada en relación ao **Estudo de Impacto Ambiental do parque eólico Marcofán** nos concellos de Beariz, Boborás e O Irixo (Ourense), no relativo aos aspectos sobre os que se solicita informe, conclúese que non é previsible que o proxecto poida causar impactos ambientais significativos, tendo en conta as medidas protectoras e correctoras que o promotor prevé adoptar no documento ambiental presentado e as consideracións a tal efecto referidas no presente informe.

Destacar que as instalacións proxectadas atópanse soamente en parte no ámbito territorial da Demarcación Hidrográfica de Galicia Costa, polo que se debería realizar a consulta á Confederación Hidrográfica do Miño-Sil.

Durante os procesos de execución dos traballos de desenvolvemento e implantación da actuación proposta, de cara a non afección ao dominio público hidráulico, deberán contemplarse as directrices sinaladas no presente informe así como as indicadas na documentación sometida a informe.



Cómpre indicar que o informe emítese estritamente desde o punto de vista das competencias deste organismo de bacía, sen entrar a valorar outras consideracións técnicas, urbanísticas ou ambientais que non son obxecto do mesmo e sen prexuízo dos condicionantes que se poidan establecer nas preceptivas autorizacións de Augas de Galicia que se tramiten segundo o establecido nos artigos 9.4, 78 e 126 do RDPH.

Santiago de Compostela – A xefa de área de autorizacións e concesións – María C. Beneyto González-Baylín (sinatura dixital)

Santiago de Compostela – subdirector xeral de Xestión do Dominio Público Hidráulico – Roberto Arias Sánchez (sinatura dixital)

